

Beschreibung.

Als sie nun vernamen das man der vntrew mit in wolt spilen/wurden sie auß anleitung Machometi dahin beredt/ das sie in Syriam wichen/Damascum ein namen/vñ sich alda sterckte/ Egipften überfielen/darnach an Persiden hin/nachmals an Anthiochiam/ Jerusalem/das jr gewalt vnnd nam gleich also wuchs vnnd all jr sach so siglich stünd das in niemand mehr mocht widerstehn.

¶ Von des Türcken hoffe vnnd Gwardy.

Der Türckisch Keyser hat dreierley hoffgesind/ erstlich sein achttausent soldner/dise haben all Castell vnnd döffer wie ein ieder verdient ist/ auß gnad des Keyseris für iren sold vnnd all dero einkömen.

Zum andern hat der Türck ein reutterey vnnd volck/ das on allen sold selbs streitet/vnnd allweg fornen an der spizen seind/ alles so sie gewinnen ist jr allein/den fünfften theil überliuern sie dem König/ dero seind bei fierzig mal tausent.

Das dritt geschlecht/seind der außbündt bei achthundert/ auß den Persern vnnd Scyten/einn versamlet ritterschafft/das seind des Königs rätthe/trabanten vnnd ritterschafft/ vnnd seind gemeinglich auß den erwachsenen Knaben so die König etwa mißbraucht haben.

An disem volck ist nichts mehr zuerwundern/dann ein übergroße eyl vnnd schnelligkeit inn all irem thün/vnd ein standemütig stett hertz vnnd vnwanckelbar gemüt/ das sich nit gibt/nachlaßt noch verzagt.

Gute feldordnung vnd grosse gerechtigkeit/geschweig hie der übernatürlichen kunst vnder vnnd ob dem wasser zuschwimmenn/ein langen weg vnnd zeit/geschicklichkeit sich von den bergenn zulassenn/fertig über stock vnnd plock/keins lebens/keins schlaffs/keins hungers/frost/ıc.wirt verschonet.Niemand wirt mit wein beladen.Da wirt kein spil gelitten sonder iedermann wart seins dings. Sie seind allein zu vnsern zeitten die nach rechter art vnd kunst des kriegs kriegen.

Sie bitten für die kriegsleut in all jr versamlung/ fürnemlich für die erschlagen die sie heilig zelen vnnd für martirer achten.

Sie enthalten sich darüb auß einem gesatz vom wein/dz daranf aller vnrat kompt. Wer menschenn blüt vergeußt/des blüts muß vergossen werden/vñ gehet in dem fall Moses steiff bei in im schwanz/zan vmb zan/hand vmb hand ıc.

Denen.